

KHUTBAH JUMAAT

“PERPADUAN ASAS KESTABILAN NEGERI” (10 Disember 2021M/ 5 Jamadilawal 1443H)

الْحَمْدُ لِلَّهِ، الْحَمْدُ لِلَّهِ الَّذِي خَلَقَ الْإِنْسَانَ فِي أَحْسَنِ تَقْوِيمٍ، وَأَمَرَنَا
بِالتَّقْوَى وَالْخُلُقِ الْكَرِيمِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.
أَمَّا بَعْدُ، فَيَا أَيُّهَا الْمُؤْمِنُونَ، اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ،
فَقَدْ فَازَ الْمُتَّقُونَ.

Kaum muslimin yang dirahmati Allah,

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat. Marilah kita bersama-sama mendengar dan menghayati khutbah yang bertajuk :
‘Perpaduan Asas Kestabilan Negeri’.

Kaum muslimin yang dirahmati Allah,

Alhamdulillah, segala puji bagi Allah yang telah menjadikan kita satu ummah dengan pegangan akidah yang sama. Firman-Nya dalam surah al-Anbiyaa’ ayat 92:

إِنَّ هَذِهِ أُمَّتُكُمْ أُمَّةً وَاحِدَةً وَأَنَا رَبُّكُمْ فَاعْبُدُونِ ﴿٩٢﴾

Maksudnya: *Sesungguhnya agama Islam inilah agama kamu, agama yang satu asas pokoknya, dan Akulah Tuhan kamu; maka sembahlah kamu akan Daku.*

Dengan bimbingan dan pimpinan Rasulullah *sallallahu alaihi wasallam*, di atas pasak kebenaran dan petunjuk rabbani, terbentuknya satu ummah. Ia adalah asas yang dibina kukuh berdasarkan ketinggian prinsip-prinsip yang jelas. Diriwayatkan daripada Abu Nadhrah *radiallahu anhu* bahawa Nabi *sallallahu alaihi wasallam* bersabda:

((يَا أَيُّهَا النَّاسُ، أَلَا إِنَّ رَبَّكُمْ وَاحِدٌ، وَإِنَّ أَبَاكُمْ وَاحِدٌ، أَلَا لَا فَضْلَ لِعَرَبِيٍّ عَلَى عَجَمِيٍّ، وَلَا لِعَجَمِيٍّ عَلَى عَرَبِيٍّ، وَلَا أَحْمَرَ عَلَى أَسْوَدَ، وَلَا أَسْوَدَ عَلَى أَحْمَرَ، إِلَّا بِالتَّقْوَى))

Maksudnya: *Wahai manusia, ketahuilah sesungguhnya Tuhan kamu adalah satu, dan bapa kamu adalah satu. Tiada kelebihan bagi orang Arab ke atas orang ajam (bukan Arab), dan tiada kelebihan orang ajam ke atas orang Arab, tiada kelebihan orang berkulit putih ke atas orang berkulit hitam dan tiada kelebihan orang berkulit hitam ke atas orang berkulit putih melainkan dengan takwa.*

(Hadith riwayat Imam Ahmad)

Kaum muslimin yang dirahmati Allah,

Di atas dasar kesatuan aqidah inilah, yang berteraskan pegangan Ahlissunnah Waljama'ah, umat Islam wajib bersatu dan tidak berpecah belah. Kesatuan umat Islam adalah kekuatan dan

kemuliaan. Tetapi mestilah menurut petunjuk Allah, bukan kerana balasan dunia, harta atau pangkat. Firman Allah *subhanahu wata'ala* dalam surah Ali Imran ayat 103:

وَأَعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا ۗ وَاذْكُرُوا نِعْمَتَ اللَّهِ عَلَيْكُمْ إِذْ كُنْتُمْ
أَعْدَاءً فَأَلَّفَ بَيْنَ قُلُوبِكُمْ فَأَصْبَحْتُمْ بِنِعْمَتِهِ إِخْوَانًا ...

Maksudnya: *Dan berpegang teguhlah kamu sekalian kepada tali Allah (agama Islam), dan janganlah kamu bercerai-berai; dan kenanglah nikmat Allah kepada kamu ketika kamu bermusuhan-musuhan (semasa jahiliyah dahulu), lalu Allah menyatukan di antara hati kamu (sehingga kamu bersatu-padu dengan nikmat Islam), maka menjadilah kamu dengan nikmat Allah itu orang-orang Islam yang bersaudara...*

Perintah Allah untuk bersatu padu merupakan satu kewajipan. Manakala perpecahan pula merupakan satu larangan. Berkenaan ayat tersebut Imam al-Qurtubi *rahimahullah* dalam tafsirnya menyatakan:

فَإِنَّ اللَّهَ تَعَالَى يَأْمُرُ بِالْأُلْفَةِ، وَيَنْهَى عَنِ الْفُرْقَةِ، فَإِنَّ الْفُرْقَةَ هَلَكَةٌ،
وَالْجَمَاعَةُ نَجَاةٌ

Maksudnya: *“Sesungguhnya Allah Taala memerintahkan dengan kesatuan dan melarang daripada perpecahan. Sesungguhnya perpecahan itu adalah kehancuran dan jemaah (kesatuan) itu adalah selamat (kejayaan)”*.

Kita telah menyaksikan bahana perpecahan dalam kalangan umat Islam yang membawa kehancuran. Bacalah dan belajarlh daripada sejarah kejatuhan kerajaan Abbasiyyah. Renungi dan insafilah bagaimana sakit dan deritanya kejatuhan Empayar Uthmaniyyah. Begitu juga jatuhnya Kota Melaka kepada Portugis adalah akibat perpecahan dalaman.

Justeru, buanglah perasaan tamak, benamkanlah sikap dengki dan dendam kesumat. Kuburkanlah sifat pentingkan diri sendiri. Semuanya adalah musuh kesatuan umat Islam, selain menjadikan kita lemah dalam segenap aspek kehidupan dunia termasuk aspek kekuasaan, sosio ekonomi dan bernegara, lebih malang perpecahan akan mengheret kita pula ke lembah kemurkaan Allah *subhanahu wata'ala* di akhirat nanti.

Semua perkara ini, pernah diperingatkan oleh baginda Nabi *sallallahu alaihi wasallam* sejak sekian lama, kerana ia adalah penyakit umat terdahulu yang akhirnya membawa kehancuran. Diriwayatkan daripada al-Zubair bin al-'Awwam *radiallahu anhu* bahawa Nabi *sallallahu alaihi wasallam* bersabda:

((دَبَّ إِلَيْكُمْ دَاءُ الْأُمَمِ قَبْلَكُمْ: الْحَسَدُ وَالْبَغْضَاءُ، هِيَ الْحَالِقَةُ، لَا أَقُولُ تَخْلُقُ الشَّعْرَ وَلَكِنْ تَخْلُقُ الدِّينَ ...))

Maksudnya: Penyakit umat sebelum kamu telah menyerap masuk ke dalam kalangan kamu, iaitu hasad dengki dan persengketaan, ia

adalah pencukur. Aku tidak mengatakan ia mencukur rambut, akan tetapi ia mencukur agama ...

(Hadith riwayat Imam at-Tirmizi)

Apabila sesama umat Islam berdengki, khianat kepada agama, saling menjatuhkan, tergamak menyokong musuh dan sanggup menggadaikan maruah orang Islam, maka keharmonian akan musnah. Negeri dan negara ini bakal runtuh, segala pencapaian akan jatuh dan kemajuan kita akan tersungkur. Persis seperti pisau pencukur yang menghilangkan rambut di kepala. *Wal'iyazu billah.*

Kaum muslimin yang dirahmati Allah,

Awas, dengan segelintir manusia yang suka menjadi batu api, menabur fitnah dan suka menanam sifat kebencian. Segala maklumat yang disebarakan langsung tidak bersandarkan ilmu dan fakta, jauh sekali untuk melakukan tabaiyun. Mereka inilah yang akan menanggung di air keruh. Mereka jugalah yang akan mendapat laba keuntungan di atas perpecahan umat Islam.

Justeru, uruslah perselisihan yang timbul dengan penuh hikmah. Walaupun ia berpunca daripada sebab yang sangat kecil dan remeh, tetapi jika dibiarkan ia bakal membarah. Ambillah pedoman daripada peringatan dalam al-Qur'an yang menyeru kita agar menjauhi sikap persengketaan dan berbantah-bantah yang membawa kehinaan dan kelemahan. Firman Allah *subhanahu wata'ala* dalam surah al-Anfal ayat 46:

وَأَطِيعُوا اللَّهَ وَرَسُولَهُ وَلَا تَنزَعُوا فَتَفْشَلُوا وَتَذْهَبَ رَاحَتُكُمْ وَأَصْبِرُوا إِنَّ اللَّهَ مَعَ

الصَّابِرِينَ ﴿٤٦﴾

Maksudnya: *Dan taatlah kamu kepada Allah dan Rasul-Nya, dan janganlah kamu berbantah-bantahan; kalau tidak nescaya kamu menjadi lemah semangat dan hilang kekuatan kamu, dan sabarlah (menghadapi segala kesukaran dengan cekal hati); sesungguhnya Allah beserta orang-orang yang sabar.*

Kekuatan dan kekuasaan kita akan hilang sekiranya kita terus bersengketa dan berpecah belah. Musuh tidaklah terlalu kuat, tetapi kelemahan dan perpecahan kita sesama sendiri yang menyebabkan musuh menguasai dan menentukan sikap dan tatacara kehidupan kita.

Oleh itu, marilah kita bersatu atas dasar akidah Islam yang pasti dan disimpul mati. Bersatu dalam apa juga situasi, bersatu teguh menghadapi persekitaran dan ancaman musuh yang terang dan terselindung. Bersatunya umat Islam adalah kekuatan paling dasar, mengikut garis rentas kalimah **لَا إِلَهَ إِلَّا اللَّهُ**, prinsip-prinsip penegasan al-Qur'an dan al-Sunnah serta prinsip persaudaraan Islam yang kukuh ke arah pembinaan *Khaira Ummah* (umat terbaik).

Kaum muslimin yang dirahmati Allah,

Perpaduan yang kukuh dalam kalangan rakyat termasuklah umat Islam adalah amat penting kerana ia menjadi asas kepada negeri

dan negara yang stabil dalam pelbagai aspek. Segala perancangan untuk kemajuan dan kesejahteraan rakyat dan negeri akan mudah untuk dilaksanakan apabila rakyat dan pemimpinnya bersatu hati, amanah, saling bekerjasama dan mempercayai antara satu sama lain.

Justeru, marilah kita kukuhkan tali persaudaraan Islam dan jangan berpecah belah. Kita jadikan rumah-rumah Allah (masjid dan surau) di seluruh negeri ini sebagai pusat pengupayaan kesatuan ummah yang mampan dan utuh. Saf yang kita luruskan dan kesatuan ketika solat berjemaah mengikut imam dalam segala rukun solat, ini jugalah yang perlu kita pameran ketika kita berada di tengah-tengah masyarakat. Terus bersama dalam apa juga keadaan sukar mahupun senang.

Kelas-kelas pengajian ilmu yang kita perolehi pula adalah menjadi asas pengetahuan dan tindakan ke arah perpaduan dan persaudaraan yang lebih ampuh. Gunakan media sosial seperti Whatsapp dan Instagram untuk meluaskan seruan kesatuan dan ukhuwwah. Kita mampu berubah daripada perbalahan kepada perdamaian, dan daripada persengketaan kepada saling menghormati. Semoga Allah merahmati kita semua.

Mengakhiri khutbah kali ini, khatib ingin berpesan kepada hadirin sekalian agar mengambil pedoman-pedoman berikut:

Pertama : Umat Islam hendaklah mensyukuri nikmat persaudaraan Islam yang berdiri di atas akidah untuk mengesakan

Allah, bertunjangkan kalimah tauhid bersumberkan wahyu al-Quran dan al-Sunnah serta Ijma' dan Qiyas.

Kedua : Umat Islam wajib bersatu padu dan mesti menjaga kesatuan ummah, seterusnya meninggalkan perpecahan dan berbantah-bantah.

Ketiga : Umat Islam dengan semangat persaudaraan Islam akan membawa kepada kestabilan negeri dalam semua aspek yang akan menjadi pemangkin kepada kemajuan dan kesejahteraan rakyat.

Marilah kita bersama-sama menghayati firman Allah *subhanahu wata'ala* dalam Surah al-Hujurat, ayat 10:

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.
إِنَّمَا الْمُؤْمِنُونَ إِخْوَةٌ فَأَصْلِحُوا بَيْنَ أَخَوَيْكُمْ وَاتَّقُوا اللَّهَ لَعَلَّكُمْ تُرْحَمُونَ ﴿١٠﴾

Maksudnya: *Sebenarnya orang-orang yang beriman itu adalah bersaudara, maka damaikanlah di antara dua saudara kamu (yang bertelingkah) itu; dan bertaqwalah kepada Allah supaya kamu beroleh rahmat.*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا
بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ لَعَلَّكُمْ تُفْلِحُونَ.

Kaum muslimin yang dirahmati Allah,

Marilah kita bersama-sama sentiasa mematuhi garis panduan dan Prosedur Operasi Standard (SOP) pencegahan penularan wabak COVID-19 yang telah dikeluarkan oleh pihak berkuasa. Bagi yang belum menerima vaksin, dianjurkan agar segera mendapatkannya sebagai ikhtiar untuk menyekat penularan wabak berbahaya ini dalam masyarakat. Pada masa yang sama, teruskanlah memohon keampunan dan bermunajat kepada Allah *subhanahu wata'ala* agar diangkat segera wabak ini daripada kita.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ
وَسَلِّمُوا تَسْلِيمًا ﴿٥٦﴾

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ
مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah, Ya Dzal Jalali Wal Ikram! Kabulkanlah doa kami. Terimalah segala amal ibadah dan ketaatan kami kepada-Mu. Ya Allah, kukuhkanlah perpaduan dan kesatuan hati kami. Limpahkanlah ke atas kami nikmat kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit, khususnya wabak COVID 19. Menangkanlah kami dalam memerangnya.

اللَّهُمَّ اشْفِنَا وَاشْفِ مَرْضَانَا وَمَرْضَى الْمُسْلِمِينَ، اللَّهُمَّ اجْعَلْهُ طَهُورًا
لَهُمْ، وَارْفَعْ مَنْزِلَتَهُمْ، وَأَبْدِلْهُمْ مِنْ بَعْدِ الْمَرَضِ صِحَّةً، وَمِنْ بَعْدِ
الْبَلَاءِ عَافِيَةً.

اللَّهُمَّ اَرْحَمْ مَوْتَانَا وَمَوْتَى الْمُسْلِمِينَ، اللَّهُمَّ اغْفِرْ لَهُمْ وَاَرْحَمْهُمْ،
وَعَافِهِمْ وَاغْفُ عَنْهُمْ. رَبَّنَا اُنَّا فِي الدُّنْيَا حَسَنَةٌ وَفِي الْآخِرَةِ حَسَنَةٌ
وَقِنَا عَذَابَ النَّارِ. اٰمِيْن، اٰمِيْن يَا رَبَّ الْعٰلَمِيْنَ.

عِبَادَ اللّٰهِ. اِنَّ اللّٰهَ يَأْمُرُ بِالْعَدْلِ وَالْاِحْسَانِ. وَاِتْيَا ذِي الْقُرْبَىٰ وَيَنْهَىٰ
عَنِ الْفَحْشَاۗءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُوْنَ. فَاذْكُرُوا اللّٰهَ
الْعَظِيْمَ يَذْكُرْكُمْ. وَاشْكُرُوْهُ عَلٰى نِعْمِهِ يَزِدْكُمْ. وَاَسْأَلُوْهُ مِنْ فَضْلِهِ
يُعْطِكُمْ. وَلَذِكْرُ اللّٰهِ اَكْبَرُ. وَاللّٰهُ يَعْلَمُ مَا تَصْنَعُوْنَ. اَقِيْمُوا الصَّلَاةَ.